

Il guid dal «port grischun»

La citad da Genua ha multifars connexs cun la Svizra e cun il Grischun. In nov guid – realisà da l'istoricra grischuna Prisca Roth – dat tranter auter perditga da quellas colliaziuns. Venderdi passà ha ella preschentà sia publicaziun «Genua – La Superba» en il Museum d'art a Cuira.

DAVID TRUTTMANN/FMR

Co cuntanschan Svizras e Svizzers uschè spert pussaivel ina citad a la mar? – La resposta è già dapi tschientaners bain enconuschenta: cun far il viadi a Genua. La citad al famus port mediterranean è stà durant tschientaners lieu da passagi, ma era lieu da vita e fatschenta per blers «randulins» grischuns. Perditga da quai dat p.ex. era il «Gran Bar Pasticceria» dals frars Klainguti amez Genua. Deplorablmain è quest café da tradiziun daventà victima avant passa in onn da la crisa da corona.

Sis turas tras la citad

L'istorgia da la famiglia Klainguti a Genua è mo ina da bleras che *Prisca Roth* raquinta en ses guid istoric-cultural «Genua – La Superba». Durant ils davos onns ha l'istoricra da Haldenstein e creschida si en la Val Bregaglia, passentà divers segiurns a Genua. Surtut ha ella guida scolaras e scolars da la scola auta da pedagogia dal Grischun tras la citad mediterranea. Ed en il decurs dals onns è sias retschertgas istoricas s'approfundadas e sa condensadas ad ina publicaziun da passa 400 paginas, cumparida ussa tar l'enconuschenta chasa editura svizra «Hier und Jetzt». Quest venderdi passà ha Prisca Roth pudì preschentar ses guid ad in

numerus public en il foyer dal Museum d'art dal Grischun a Cuira.

In viadi istoric tras «La Superba»

Prisca Roth maina ils lecturs cun «Genua – La Superba» en sis differentas rutas tras la citad, mussond las perlas e trovaglias per part zuppadas da questa citad sconuschida. Adina puspè datti excurs che raquintan da personalitads marcantas, da schabetgs particulars u da musica e litteratura che dechanta questa citad u ch'è naschida a Genua. Las sis rutas «turisticas» (da

3 en fin 9 kilometers) n'èn dentant betg mo in viadi geografic tras la citad, mabain era in sguard cronologic-istoric che declera co che banchiers ed architects han laschà flurir questa citad a sia plaina luschezza che tegna en fin oz, apunta «Genua – La Superba».

Il guid «Genua – La Superba» è venal en las librerias. Mardi, ils 3 da matg 2022 preschenta l'autura il cudesch era a Turitg en il Zentrum Karl der Grosse. Igl è da s'annunziar: admin@hierundjetzt.ch.



L'autura e ses guid – Prisca Roth ha pudì preschentar venderdi passà en il Museum d'art dal Grischun sia publicaziun istoric-culturala «Genua – La Superba».

FOTO DAVID TRUTTMANN